

济南愍悼王妃李尼墓志铭

尼俗讳难胜，法名等行，赵郡柏仁永宁乡阴灌里人也。昔贤哲并作，谟/明有虞，稷契以道教显，咎繇以刑辟用。道教作阳德，故男祉斯流，其迹/之验，则商周之王是已。刑辟作阴德，则女贞宜効，而往志前纪，未之有/闻。故/大齐膺箴受图，牢笼宇宙，厚载之尊，始出于我。尼则 威宗后之侄焉。/祖司空文简公希宗，中庸上性，作范真俗。父仪同三司祖勋，义气德光，/动寂俱奋。尼乃沙鹿分精，重轮旁祉，承剪发之慈，受顾复之训。敦诗悦/礼，好善亲仁，畏慎女典，尊明柔克，温和表其中润，淑理发其外朗。及事/格文祖，礼极神宗，三善所期，孟侯是属。作配之重，物议为难，谷圭所临，/无忘甥舅。以天保十年册拜皇太子妃。入奉严禁，内训唯穆。至愍悼王/逊居别馆，降为济南王，妃盖亦恬然，无惊得丧。俄而悼王即世，冤颈为/苦，哥黄鹄以告哀，咏柏舟而下泣。乃悟是法非法，如幻如梦，厌离缠染，/托情妙极，遂落兹绀发，归心上道。三乘并运，六度俱修，慈解日深，法性/增益。以毗尼藏，摄彼威仪，用修多罗，开其方便，精行乐说，众所推重。方/当住持我玄虚，栋隆我净法，而众生福尽，乃失导师。以武平元年五月/十四日，迁神于大妙胜寺舍，时年二十二焉。知与不知，无言而感。惟尼/气韵调序，识悟开明，造次不失其夷，进退无与其节。积而不滞，缁更能/通，出世间道，求常乐法，非天下之至高，其孰能与于此？粤以其月三十/日壬午，永窆于邺城之西北一十里处。不有所撰，何示将来？敬铭胜事，/置之幽壤。词曰：/

天祐六气，降生五行，地载川岳，含缁精灵。瑶光敷祉，真气効祜，时宗民/望，弈世挺生。诞兹婉淑，柔明慧理，访则审仪，观图问史。德声之发，上闻/天子，有匹元良，事归齐纪。时或申丕，义兼忻惕，晦情慎行，莫睹其迹。奄/丧所天，衔悲茹戚，毒兹烦恼，邀心利益。一舍荣好，法服在身，勤为善业，/大树明因。潜悟洞观，理会天人，宜振法鼓，穷此万春。如何不吊，忽言但/落，事迫小生，空传上药。风辛秋起，花香春作，唯有朱华，时鸣白鹤。